

Mensahe 2

Ang Unod sa Basahon ni Jeremias

Basahong Kasulatan: Jer. 2:13; 17:9; 13:23; 23:5-6; 33:16; 31:33-34

- I. Naglakip sa tulo ka butang ang unod sa basahon ni Jeremias—unsay gusto sa Dios kanato, unsa ta sa hulog natong kahimtang, ug unsa si Cristo alang nato; aron makita kining tulo ka butang, “buk-on” gyod nato ang kabhang sa Jeremias ug itingob ang atong pagtagad sa unod sa sulod, nga mao ang kompletong pagtulon-an sa tibuok Biblia.**
- II. Labi gyong gihisgotan sa Jeremias 2:13 kon unsay gusto sa Dios kanato, nga nagpadayag nga ang atong Dios mao ang tuboran sa buhing mga tubig:**
 - A. Ang tuyo sa Dios sa Iyang pamatigayon pagkahimo mang tuboran, tinubdan, sa buhing mga tubig nga motagbaw nato aron makapahimulos ta; gusto Siya nga dawaton nato Siya nga tinubdan, tuboran, sa atong pagkamao; ang bugtong paagi nga madawat nato ang Dios nga tuboran sa buhing mga tubig pag-inom man Kaniya adlaw-adlaw—v. 13; 1 Cor. 12:13; Rom. 11:36:
 1. Nagkinahanglan kini nga mapadayonon tang motawag sa Ginoo (uban sa pagpasalamat, pagkalipay, pag-ampo, ug pagdayeg) ug motimba og tubig nga magkalipay gikan Niya nga tuboran sa buhing mga tubig—Isa. 12:3-4; Juan 4:10, 14; Rom. 10:12; 1 Tes. 5:16-18; 4:3.
 2. Gipakita sa Isaias 12:3 nga ang paagi sa pagdawat sa Dios nga atong kaluwasan pagtimba mag tubig gikan sa mga tubod sa kaluwasan, sa ato pa, pag-inom Kaniya—Sal. 36:8; Juan 4:14; 7:37; 1 Cor. 12:13; Bug. 22:17; 1 Cron. 16:8; Sal. 105:1; 116:1-4, 12-13, 17:
 - a. Aron mahimong atong kaluwasan, nahikay ang Tulo-usang Dios aron mahimong Espiritung taghatag-og-kinabuhi nga buhing tubig, ang tubig sa kinabuhi; ang praktikal nga kaluwasan sa Dios mao ang nahikay nga Tulo-usang Dios mismo nga buhing tubig—1 Cor. 15:45; Juan 7:37-39; Bug. 7:17; 21:6; 22:1, 17.
 - b. Ang tuboran mao ang tinubdan, ang tubod mao ang pagtubod, ang lugwa, sa tinubdan, ug ang suba mao ang agay; ang pamulong *ang mga tubod sa kaluwasan* nagpasabot nga ang kaluwasan maoy tinubdan, sa ato pa, ang tuboran; ang Dios nga atong kaluwasan maoy tuboran (Isa. 12:2), si Cristo ang mga tubod sa kaluwasan aron atong mapahimuslan ug masinati (Juan 4:14), ug ang Espiritu mao ang agay ning kaluwasan sa sulod nato (7:38-39).
 - c. Aron makapahimulos sa kaluwasan, kinahanglan makaamgo ta nga ang Ginoo mismo mao ang atong kaluwasan, kalig-on, ug alawiton ug nga sa pagtawag nato sa Iyang ngalan makatimba tag tubig nga magkalipay gikan sa mga tubod sa kaluwasan—Isa. 12:2-3.
 - d. Ang paagi sa pagtimbang tubig gikan sa mga tubod sa diosnong kaluwasan naglakip sa paghinulsol, pagtawag, pag-awit, pagpasalamat, pagdayeg, ug pagpahibalo sa makaluwas nga binuhatan sa Dios—vv. 4-6.
 - B. Mosulod ngani nato ang buhing tubig, motuhop kini nato, moagi sa tibuok natong pagkatawo, ug mahilis-sagol nato, ug tungod niana matil-ogan ta, matransporma, masama, ug mahimaya—v. 3; Juan 4:10, 14; Rom. 12:2; 8:29-30.

Mensahe 2 (sumpay)

- C. “Ang tubig nga ihatag Nako niya mahimo hinuon tuboran sa tubig diha niya nga motubod ngadto sa kinabuhing walay kataposan”—Juan 4:14:
1. Niagay ang Tulo-usang Dios diha sa Diosnong Trinidad sa tulo ka hugna: ang Amahan mao ang tuboran, ang Anak mao ang mga tubod, ug ang Espiritu mao ang suba.
 2. “Ngadto sa kinabuhing walay kataposan” ang pag-agay sa Tulo-usang Dios:
 - a. Ang Bag-ong Jerusalem maoy kinatibuk-an sa kinabuhing walay kataposan, ug nagpasabot ang pulong *ngadto* og “mahimo”; busa, nagpasabot ang *ngadto sa kinabuhing walay kataposan* og mahimong kinatibuk-an sa kinabuhing walay kataposan, ang Bag-ong Jerusalem.
 - b. Sa pag-inom nato sa buhing tubig, mahimo tang Bag-ong Jerusalem, ang kinatibuk-an sa kinabuhing walay kataposan, ang sangpotanan sa nag-agay nga Tulo-usang Dios.
- D. Ang tumong sa Dios sa pagkahimo Niyang tuboran sa buhing mga tubig pagpalugwa man sa iglesia nga pagtubo Niya aron mahimong kahupnganan Niya nga magpadayag Niya; kini ang gitinguha sa kasingkasing, ang gikahimut-an, sa Dios sa Iyang pamatigayon—Jer. 2:13; Lam. 3:22-24; 1 Cor. 1:9; Efe. 1:5, 9, 22-23.
- E. Ang Dios ra gyod nga tuboran sa buhing mga tubig ang makakuha sa atong kauhaw ug makatagbaw nato; ang Dios ra gyod nga gipaambit sa atong pagkatawo ang makahimo natong pagtubo Niya nga magpadayag Niya—Bug. 22:1, 17.
- F. Makaamgo gyod unta ta nga makulangan ngani ang katawhan sa Dios sa Espiritu sa kinabuhi nga tubig sa kinabuhi, magkaproblema gyod sila; kon dunay kadagaya sa nagluwas nga Espiritu nga buhing tubig ang katawhan sa Dios, masulbad gyod ang mga problema nila sa usag usa ug sa Dios—Exo. 17:1-7; Num. 20:2-13.

III. Ang usa pa ka aspeto sa unod sa basahon ni Jeremias mao ang pagbutyag kon unsa ta sa hulog natong kahintang:

- A. “Malimbongon ang kasingkasing labaw sa tanang butang, / Ug dili gyod kini maulian; / Kinsay makaila niini?—17:9:
1. Bisan kining pulonga kalabot sa malimbongon ug dili na maulian nga kasingkasing sa tawo may kalabotan man sa pamatigayon sa Dios ug sa Iyang pagpaambit; bisan nadaot ug malimbongon ang kasingkasing sa tawo ug dili na maulian ang kahintang niini, bisan kanang kasingkasinga mahimo mang papan nga kasulatan sa Dios sa Iyang balaod sa kinabuhi—31:33; itandi sa 2 Cor. 3:3.
 2. Nagpadayag kini nga dunay paagi ang Dios sa pagpaambit sa Iyang Kaugalingon nganha sa tawo; sa makasulod na Siya sa tawo, mokaylap ang Dios gikan sa espiritu sa tawo ngadto sa iyang kasingkasing; kini ang paagi sa Dios, sumala sa Iyang pamatigayon, sa pagbatok sa kasingkasing sa hulog nga tawo.
- B. “Makausab ba ang Cusihanon sa iyang panit, / O ang leopardo sa mga kabang niini? / Nan makabuhat sab tingali mog maayo, / Nga naanad na sa pagbuhat og daotan”—Jer. 13:23:
1. Kay gisalikway man ang Dios nga tinubdan, ang tuboran sa buhing mga tubig (2:13), nahimong daotan ang Israel, dunay dili na mausab ug masal-anong kinaiya, sama sa panit sa Cusihanon ug sa mga kabang sa leopardo, nga dili na mausab; nagbutyag kini sa tinuod nga kahintang sa hulog nga tawo.
 2. Isip hulog nga mga tawo, dili na gyod ta maulian ug dili na mausab diha sa atong kaugalingon ug pinaagi sa atong kaugalingon ug uban sa atong kaugalingon—Rom. 7:18; Mat. 12:34-35; 15:7-11, 18-20; 1 Cron. 28:9; itandi sa Ezeq. 36:26-27; Jer. 32:39-40.

Mensahe 2 (sumpay)

- C. Tanang tinuod nga nakakitag panan-awon sa Ginoo diha sa Iyang himaya nahayagan man sa iyang konsensya kalabot sa pagkahugaw niya; unsa katin-aw ang pagkaamgo nato bahin sa atong kaugalingon nag-agad kon unsa katin-aw ang pagkakita nato sa Ginoo—Isa. 6:5; Juan 12:41; Job 42:5-6; itandi sa Luc. 5:8:
1. Labi tang makakita sa Ginoo ug mabutyag, labi sab tang mahinloan; mintinahon gyod ang pakig-ambitay nato sa Ginoo pinaagi sa sigeng paghinlo sa Iyang dugo—1 Juan 1:7, 9.
 2. Sa kahulogan sa Bag-ong Tugon, ang makakita sa Dios sama ra sa makabaton sa Dios sa personal natong kasinatian; ang makabaton sa Dios kana mang makadawat sa Dios sa Iyang elemento, kinabuhi, ug kinaiya aron mahimo tang Dios sa kinabuhi ug kinaiya apan dili sa ranggo sa pagka-Dios.
 3. Magtransporma nato ang pagkakita nato sa Dios (2 Cor. 3:16, 18; Mat. 5:8), kay sa pagkakita nato Niya madawat man nato ang Iyang elemento ug mahaw-as ang atong daang elemento; ang makakita sa Dios kana mang matransporma ngadto sa mahimayaong dagway ni Cristo, sa Dios-tawo, aron makapadayag ta sa Dios diha sa Iyang kinabuhi ug makarepresentar Niya diha sa Iyang pagbulot-an.
 4. Ang Dios mismo nga gitutokan nato karon mao ang nahingpit nga Espiritu, ug makatutok ta Niya diha sa atong espiritu; sa atong pagtukaw sa buntag, bisan sa kinse o baynte minutos lang, duna tay panahon nga makig-uban sa Ginoo, panahon nga magpabilin diha sa Espiritu.
 5. Makaampo-basa ta sa Iyang Pulong, makapakigsultianay Niya, o makaampo ba Niya sa mughong pag-ampo; mabati dayon nato nga duna tay nadawat nga elemento sa Dios, nga nasuyop nato ang kadato sa Dios nganhi sa atong pagkatawo; sa ingon niini maanaa ta sa diosnong pagtransporma adlaw-adlaw; tungod gyod kini sa pagtutok nato sa nahingpit nga Dios nga Espiritu nga naa sa atong espiritu.
 6. Labi tang makakita sa Dios, makaila sa Dios, ug mahigugma sa Dios, labi sab natong ayran ang atong kaugalingon ug labi natong dumilian kini—Job 42:6; Mat. 16:24; Luc. 9:23; 14:26.

IV. Ang ikatulong butang sa unod sa basahon ni Jeremias kana mang unsa si Cristo alang nato:

- A. “Oo, moabot na ang mga adlaw, / Niingon si Jehova, / Nga magpatindog Kog matarong nga Saha alang ni David... / Ug mao kini ang Iyang ngalan nga ingalan Kaniya: / Si Jehova nga atong pagkamatarong”—23:5-6; itandi sa 33:16:
1. Si *Jehova nga atong pagkamatarong* nagpasabot ni Cristo sa Iyang pagkadios, ug ang *matarong nga Saha*, nagpasabot ni Cristo sa Iyang pagka-tawo.
 2. Nagpakita ang ngalan dinhi, si Jehova nga atong pagkamatarong, nga si Cristo, nga kaliwat ni David, dili lang tawo kondili si Jehova sab mismo nga naglalang sa mga langit ug sa yuta, nagpili ni Abraham, nag-establisar sa kaliwat sa Israel, ug maoy Ginoo ni David, ang ginganlan niyag Ginoo (Mat. 22:42-45; itandi sa Bug. 5:5; 22:16); nianhi si Cristo ingon nga Saha ni David (ang anak ni David) nga mao si Jehova mismo (ang Ginoo ni David) aron mahimong pagkamatarong sa katawhan sa Dios (1 Cor. 1:30):
 - a. Basi sa Iyang katubsan, makatuo ta ni Cristo aron mapasaylo sa Dios (Buh. 10:43), ug makamatarong ang Dios kanato (Rom. 3:24, 26) ug sul-oban tag Cristo nga kupo sa pagkamatarong (Isa. 61:10).
 - b. Naghatag kinig higayon nga makasulod nato si Cristo nga pagkalawas sa Tulo-usang Dios (Col. 2:9) ingon nga atong kinabuhi (3:4), atong balaod sa kinabuhi

Mensahe 2 (sumpay)

sa sulod (Jer. 31:33), ug atong tanan aron ipaambit ang Iyang Kaugalingon sa tibuok natong pagkatawo aron mahuman ang walay kataposang pamatigayon sa Dios.

- B. Si Cristo mismo ang bag-ong pakigsaad, ang bag-ong tugon, sa kinabuhi nga gihatag sa Dios kanato—Isa. 42:6; 49:8; Jer. 31:31-34; Heb. 8:8-12:
1. Sa Griyego gigamit ang mao rang pulong alang sa *pakigsaad* ug *testamento*:
 - a. Pareha ra ang pakigsaad ug ang testamento, apan sa buhi pa ang naghimo sa pakigsaad, pakigsaad kini, ug sa mamatay na siya, testamento kini; sa pinulongan karon ang testamento mao ang tugon.
 - b. Ang pakigsaad kasabotan nga dunay mga saad nga mobuhat og pipila ka butang alang sa mga tawong gikapakigsaaran, samtang ang testamento tugon nga dunay pipila ka butang nga nahuman na nga gibilin ngadto sa manununod—9:16-17; itandi sa Deut. 11:29; 28:1, 15; Jer. 31:31-32.
 2. Hulagway sa Dios ang daang pakigsaad sa kasugoan, apan persona sa Dios ang bag-ong pakigsaad sa grasya—Juan 1:16-17:
 - a. Sa motuo ta ni Cristo, mosulod nato ang persona ning hulagway, ug tumanon Niya dinhi nato ang matarong nga mga gipangayo sa kasugoan sa maggawi ta uyon sa espiritu ug mopatumong sa atong salabotan sa espiritu—Ezeq. 36:26-27; Rom. 8:2, 4, 6, 10.
 - b. Pinaagi sa kamatayon ni Cristo gituman Niya ang mga gipangayo sa pagkamatarong sa Dios segun sa Iyang kasugoan ug gihimo ang bag-ong pakigsaad (6:23; 3:21; 10:3-4; Luc. 22:20; Heb. 9:16-17), ug sa pagkabanhaw Niya nahimo Siyang bag-ong pakigsaad lakip na sa tanang kabilin niini (1 Cor. 15:45; Isa. 42:6; Fil. 1:19).
 - c. Sa pagkayab ni Cristo giablihan Niya ang linukot nga basahon sa bag-ong pakigsaad kalabot sa pamatigayon sa Dios, ug sa langitnong pagpangalagad Niya isip Tigpataliwala, Tigpatuman, gituman Niya ang mga sulod niini—Bug. 5:1-5; Heb. 8:6; 9:15; 12:24.
 - d. Isip Leon sa banay ni Juda, gidaog ug gipildi na ni Cristo si Satanas, isip Corderong nagtubos, gikuha ni Cristo ang sala ug mga sala sa hulog nga tawo, ug isip pito ka Espiritu, gipatuhop ni Cristo kanato ang Iyang Kaugalingon isip mga sulod sa linukot nga basahon sa bag-ong pakigsaad—Bug. 5:5-6; Juan 1:29.
 - e. Gipakigsaad na kanato ang kaluwasan sa Dios, ang mga panalangin sa Dios, ug ang tanang kadato sa Dios, ug si Cristo kining pakigsaara; si Cristo ang realidad sa tanang gatosan ka kabilin sa Bag-ong Tugon; gibut-an na sa Dios nga ihatag ang Iyang Kaugalingon kanato diha ni Cristo ingon nga Espiritu—Gen. 22:18; Gal. 3:14; 1 Cor. 1:30; 15:45; Efe. 1:3; 3:8; Juan 20:22.
 3. Ang atong espiritu maoy “pundohanan sa bangko” sa tanang kabilin sa bag-ong pakigsaad; pinaagi sa balaod sa Espiritu sa kinabuhi, gipaambit kining tanang kabilin kanato ug gipatinuod kanato—Rom. 8:2, 10, 6, 11, 16; Heb. 8:10; Juan 16:13.
 4. Ang sentro, ang sulod, ug ang realidad sa bag-ong pakigsaad mao ang balaod sa kinabuhi sa sulod (Rom. 8:2); sa pagkamao niini, nagpasabot kining balaora sa diosnong kinabuhi, ug ang diosnong kinabuhi mao ang Tulo-usang Dios, nga gipakalawas diha sa malangkobon-sa-tanan nga Cristo ug naamgohan ingon nga Espiritung taghatag-og-kinabuhi (Col. 2:9; 1 Cor. 15:45); Siya ang nahikay ug nahingpit na aron mahimong tanan sa piniling katawhan Niya:

Mensahe 2 (sumpay)

- a. Sa bag-ong pakigsaad gibutang sa Dios ang Iyang Kaugalingon nganha sa pini-ling katawhan Niya ingon nga ilang kinabuhi, ug balaod, dihadhang gahom ug awtomatikong prinsipyo kining kinabuhia—Heb. 8:10; Rom. 8:2.
- b. Segun sa kinabuhi niini, ang balaod sa bag-ong pakigsad mao ang nahikay nga Tulo-usang Dios, ug segun sa kagamitan niini, kini ang makagagahom-sa-tanan nga diosnong kapasidad; makahimo sa tanan sa sulod nato kining kapasidara aron matuman ang pamatigayon sa Dios.
- c. Sa pagkamao, kining balaora mao ang Dios diha ni Cristo ingon nga Espiritu, ug sa kagamitan dunay kapasidad kini nga mohimo natong Dios (vv. 2, 10, 6, 11, 28-29); labot pa, ang kapasidad sa balaod sa kinabuhi sa sulod moumol nato nga mga bahin sa Lawas ni Cristo (1 Cor. 12:27; Efe. 5:30) nga dunay tanang matang nga kagamitan (Rom. 12:3-8; Efe. 4:11, 16).
- d. Ang pagsulat sa balaod sa kinabuhi diha sa atong kasingkasing nitakdo sa pagtulon-an sa Bag-ong Tugon kalabot sa pagkaylap sa diosnong kinabuhi gikan sa sentro sa atong pagkatawo, nga mao ang atong espiritu, nganha sa palibot, nga mao ang atong kasingkasing (Heb. 8:10; Rom. 8:9; Efe. 3:17); gisulat sa Dios ang Iyang balaod diha sa atong kasingkasing sa pagbuhat Niya gikan sa atong espiritu nganha sa atong kasingkasing aron isulat ang Iyang pagkamao nganha sa atong pagkatawo (2 Cor. 3:3).
- e. Pinaagi sa dihadhiha, awtomatikong pagbuhat sa diosnong kinabuhi sa sulod nato, duna tay kapasidad nga makaila sa Dios, magkinabuhi sa Dios, ug mahimo man nganing Dios diha sa Iyang kinabuhi ug kinaiya apan dili sa ranggo sa Iyang pagka-Dios aron mahimo tang Iyang pagtubo, pagdako, ug makahupnganan Niya nga walay kataposang magpadayag Niya—Efe. 3:16-21.